

七十二家集

潘太常集目錄

卷一

賦

東武館賦有序

西道賦久

懷退賦

武庫賦

釣賦

火賦

苦雨賦

琉璃碗賦

瑤瑁碗賦

扇賦

石榴賦

桑楸賦

芙蓉賦

鼈賦

有引

朝菌賦序

詩

七月七日侍皇太子宴玄圃

贈陸機出爲吳王郎中令

六章

陸機答潘尼附

答陸士衡

陸機贈潘尼附

陸機贈潘正叔詩附

答傅咸詩

并序

傅咸答潘尼詩附

并序

皇太子集應令

皇太子社

三月三日洛水作

贈河陽詩

贈侍御史王元貺

贈長安令劉正伯

贈隴西太守張止治

贈滎陽太守吳子仲

答楊士安

送盧景宣

迎大駕

逸民吟

釋奠詩

送大將軍掾盧晏

贈汲郡太守李茂彥

贈劉佐

卷二

頌

釋奠頌

有序

後園頌

箴

乘輿箴

有序

論

安身論

序

送二李郎詩序

碑

益州刺史楊恭侯碑

給事黃門侍郎潘君碑

附錄

潘尼傳

唐太宗

贈潘尼

晉郭璞

祖道畢雍孫劉邊仲潘正叔

晉陸機

遺事

集評

潘太常集卷之一

晉滎陽潘尼正叔著

明閩漳張燮紹和纂

賦

東武館賦

有序

東武館者蓋東武陽侯之館也俄而遷居謂余
曰吾將老焉故有終焉之心而無移易之志子
且爲我賦之

嘉大雅之洪操美明哲之保身懲都邑之迫險

厭里巷之翬塵慕古公之胥宇羨孟氏之審隣
將遷居于爽塏乃投迹於里仁前則行旅四湊
通衢交會水泛輕舟陸方羽蓋後則崇山崔嵬
茂林幽藹彌望遠覽滉漭夷泰表裏山河出入
襟帶若乃潛流旁注飛渠脉散芙蓉映渚靈芝
蔽岸於是逍遙靈沼遊豫華林彎弓撫彈娛志
蕩心栝不空縱綸不苟沈遊鱗雙躍落羽相尋
膳夫進俎虞人獻鮮春醴九醞嘉豆百籩隨波
沂流乍往乍旋

西道賦

異山河之阻阨倦關谷之盤紆車低徊於潛軌
馬佗僚於險塗狗肘還勾羊角互戾菟窟連投
十數億計石子之澗坎塤之穴支體爲之危竦
形骸爲之疲曳此亦行者之艱難羈旅之困敝
若其名坂則羊羹八特成臯黃馬迴波激浪飛
沙飄瓦馬則頓躓狼傍虺頽玄黃牛則體疲力
竭損食喪膚蹠蹄穿領摩髁脫軀

又

道深地狹坂峭軌長輪輿顛覆人馬什僵

懷退賦

伊疇昔之懷憤思天飛以遠迹望循塗而投軌
遡翔風以理翮與雲霧之可憑希天路之開闢
何時願之多違奄就羈以服役困吳坂之峻阻
畏鹽車之嚴策嗟遊處之弗遇奚鬱悵之難任
背宇宙之寥廓羅網罟之重深常屏氣以歛迹
焉遊豫以娛心傳釋板以亮殷望投竿而相姬
窮獨善以全質達兼利以濟時聃安志於柱史
由抗迹於蒿箕理殊塗而同歸雖百慮其何思

敢因虛以託談遂逡巡而造辭

武庫賦

若夫大刀寶劍曠世絕殊煉質於昆吾之竈定
形於薛燭之鑪

釣賦

抗余志於浮雲樂余身於蓬廬尋渭濱之遠跡
且游釣以自娛左援脩竹右縱飛綸金鉤厲鉅
甘餌垂芬衆鯢奔涌游鱗橫集觸餌見擒值鉤
被執長繯續紛輕竿翕熠雲往颿馳光飛電入
曜靈未及警策蓋已獲其數十且夫燔炙之鮮
煎熬之味百品千變殊芳異氣隨心適好不可
勝紀乃命宰夫膾此潛鯉名工習巧飛刀逞伎
電剖星流芒散縷解隨風離鰐連翩雪累西戎

之蒜南夷之薑醎酸調適齊和有方紅麴之飯
糝以菰梁五味道洽餘氣芬芳和神安體易思
難忘

火賦

覽天人之至周
嘉火德之爲貴
含太陽之靈曜
體淳剛之正氣
先聖仰觀通神
悟靈窮物盡數
研幾至精形生
於未兆聲發於無
象尋之不得其
根聽之不聞其
響來則莫見其
跡去則不知其
往似大道之未
離而元氣之灝
灏故能博瞻羣
生資育萬類盛
而不暴施而不
費其變無方其
用不匱鑽燧造
火陶冶羣形協
和五味革變羶
腥酒醴烹飪于
斯獲成爾乃狄
牙典膳百品

既陳和羹旨醕旨酒醴醇烹鼈烹鼈灼龜臠鱗
若乃流金化石鑠鐵融銅造制戎器以戒不恭
砥鍊兵械整飾軍容四海康乂邊境無寇韜弓
戢劍解甲釋冑銷鏑爲耒鑄戈爲耨戰士反於
耕農戎馬放乎外廐及至焚野燎原陸火赫曦
林木摧拉沙粒並糜騰光絕覽雲散霓披遂及
衝風激揚炎光奔逸玄煙四合雲蒸霧萃山陵
爲之崩弛川澤爲之涌沸去若風驅疾如電逝
芬輪紆轉倏忽橫厲蕭條長空野無矛遺無隰

不灰無堦不斃震響達乎八冥流光燭乎四裔
榛蕪旣除九野謐清蕩枝瘁於凜秋候來春而
改生其揚聲發怒則雷電之威也明照遠鑒則
日月之暉也甄陶品物則造化之制也濟育羣
生則天地之惠也是以上聖人擬火以制禮鄭
僑據猛以立政功用關乎古今勲績著乎百姓

苦雨賦

氣觸石而結蒸兮雲膚合而仰浮雨紛射而下
注兮潦波湧而橫流豈信宿之云多乃踰月而
成霖瞻中塘之浩汗聽長雷之淅淅始濛濛而
徐墜終滂沛而難禁悲列宿之匿景悼太陽之
幽沈雲暫披而驟合雨乍息而亟零旦縱縱以
達暮夜淋淋以極明鼃鼃遊於門闥蛙蝦嬉乎
中庭懼二源之并合畏黔首之爲魚處者含瘁
於窮巷行者歎息於長衢

琉璃椀賦

覽方貢之彼珍瑋茲椀之獨奇濟流沙之絕險
越葱嶺之峻危其由來也阻遠其所託也幽深
據重巒之億仞臨洪溪之萬尋按玉樹以瓊瑤
鄰沙棠與碧林瞻閬風之崔嵬顧玄圃之蕭參
於是遊西極望大蒙歷鍾山闕燭龍覲王母訪
仙童取琉璃之攸華詔曠世之良工纂玄儀以
取象准三辰以定容光映日曜圓盛月盈纖瑕
罔麗飛塵靡停灼爍旁燭表裏相形凝霜不足

方其潔澄水不能喻其清剛過金石勁勵瓊玉
磨之不磷涅之不濁舉茲琬以酬賓榮密坐之
曲宴流景爛晃以內澈清醴瑤琰而外見

璚琚琬賦

有璚琚之奇寶亦同旅于介蟲下法川以矩夷
上擬乾而規隆或步趾於清源或掉尾於泥中
隨陰陽以潛躍與龜龍乎齊風包神藏智備體
兼才高下斯處水陸皆能文若綺波背負蓬萊
爾乃遐夷效珍越裳貢職橫海萬里踰嶺千億
挺蹊荒巒摘藻辰極光曜炫晃昭爛燿艷嘉斯
寶之兼美料衆珍而靡對文不煩於錯縷采不
假乎藻績豈翡翠之足儷胡犀象之能逮

扇賦

夫器有經麤用有疎密安衆以方爲體五明以
圓爲質或託形於竹素或取固於膠漆方圓應
於規矩制度由於繩墨始顯用於荒蠻終表奇
于上國

石榴賦

安石榴者天下之奇樹九州之名果是以屬文之士或敘而賦之蓋感時而騁思覩物而興辭余遷舊宇爰造新居前臨曠澤却背清渠實有斯樹植于堂隅華實並麗滋味亦殊可以樂志可以克虛朱芳赫奕紅萼參差含英吐秀乍含乍披遙而望之煥若隋珠耀重川詳而察之灼若列宿出雲間湘涯二后漢川遊女攜類命疇逍遙避暑託斯樹以栖遲遡祥風而容與爾乃

擢纖手兮舒皓腕羅袖靡兮流芳散披綠葉於
脩條綴朱華兮弱榦豈金翠之足珍寔茲葩之
可翫商秋授氣收華歛實千房同蒂十子如一
繽紛磊落垂光耀質滋味浸液馨香流溢

桑樹賦

從明儲以省膳憇便房以偃息觀茲樹之特偉
感先皇之攸植蔚蕭森以四射邈洪庸而端直
爾乃徘徊周覽俯仰逍遙俛睨靈根上眺脩條
洞芳泉於九壤含溢露於清霄倚增城之飛觀
拂綺窓之疏寮下迢遞以極望上扶疎而參差
匪衆鳥之攸萃相皇鸞之羽儀理有微而至顯
道有隱而應期豈皇晉之貞瑞兆先見而啓茲
起尋抱於纖毫崇萬簣於始基

芙蓉賦

或擢莖以高立似彫輦之翠蓋或委波而布體
擬連壁之攢會

鼈賦有引

皇太子遊於玄圃遂命釣魚有得鼈而獻之者
令侍臣賦之

翩衡釣以振掉吁駭人而可惡旣顛墜於巖岸
方盤跚而雅步或延首以鶴顧或頓足而鷹距
或曳尾於塗中或縮頭於殼裏若乃秋水暴駭
百川沸流有東海之巨鼈乃負山而吞舟

朝菌賦序

朝菌者蓋朝華而暮落世謂之木槿或謂之日
及詩人以爲舜華宣尼以爲朝菌其物向晨而
結建明而布見陽而盛終日而殞不以其異乎
何名之多也

詩

七月七日侍皇太子宴玄圃

商風初授辰火微流朱明送夏少昊迎秋嘉禾
茂園芳草被疇於時我后以豫以遊

贈陸機出爲吳王郎中令

六章

東南之美曩惟延州顯允陸生於今五臣傳抄作鮮儔

振鱗南海濯翼清流婆娑翰林容與墳丘

玉以瑜潤隨以光融乃漸上京羽

善作

儀儲宮

坑爾清藻味爾芳風泳之彌廣挹之彌冲

崑山何有有璵有珉及爾同僚且惟近臣予涉
素秋子登青春愧無老成厠彼日新

祁祁大邦惟桑惟梓穆穆伊人南國之紀帝曰
爾諧惟王卿士俯僂從命奚恤奚喜

我車旣巾我馬旣秣星陳夙駕載脂載轄婉孌
二宮徘徊殿闥醪澄莫饗孰慰饑渴

昔子忝私貽我蕙蘭今予徂東何以贈旃寸晷
惟寶豈無璵璠彼美陸生可與晤言

陸機荅潘尼附

於穆同心如瓊如林我東日徂來餞其琛彼
美潘生實綜我心探我玉懷疇爾惠音

答陸士衡

顧茲蓬蔚厠根蘭陂膏澤雖均華不足披逮春
不茂末秋先萎子濯鱗翼我挫羽儀願言難常
載合載離昔遊禁閤祇畏夕惕今放丘園縱心
夷易口詠新詩目玩文跡予志耕圃爾勤王役
慙無琬琰以訓尺璧

陸機贈潘尼附

水會于海雲翔于天道之所混孰後孰先及
子雖殊同升太玄舍彼玄冕襲此雲冠遺情
市朝永志丘園靜猶幽谷動若揮蘭

陸機贈潘正叔詩附

過蒙時來運與爾遊承華執笏崇賢內振纓
曾城阿

答傅咸詩

并序

司徒左長史傅長虞會定九品左長史宜得
其才屈爲此職執天下清議宰割百國而長

虞性直而行或有不堪余與之親作詩以規焉

悠悠群吏非子不整嗷嗷衆議非子不靖忽荷畧紐握綱提領矯矯貞臣惟國之屏

傳咸答潘尼詩附

并序

司州秀才潘正叔識通才高以文學溫雅爲博士余性直而處清論褒貶之任作詩以見規雖褒飾之舉非所敢聞而斐祭之辭良可樂也答之雖不足以相訓報所謂

蓋各言志也

貽我妙文繁春之榮匪榮斯尚乃新其聲吉甫作頌有馥其馨寔由樊仲其德克明授此瓦礫厠彼瑤瓊貺非其喻聞寵若驚

皇太子集應令

聖朝命方岳爪牙司北鄰皇儲延篤愛設餞送遠賓誰應今日宴具惟廊廟臣置酒宜猷庭擊鼓靈沼濱羽觴飛醺醪芳饌備奇珍巴渝二八奏妙舞鼓鐸振長袪

一作袂

生迴飈曲裾揚輕塵

皇太子社

太簇協青陽履端發歲首孟月涉初旬吉日唯
上酉我后邇天休設社祈遐耆

三月三日洛水作

啓運無窮已時逝焉可追斗酒足爲歡臨川胡
獨悲暮春春服成百草敷英蕤聊爲三日遊方
駕結龍旂廊廟多豪俊都邑有艷姿朱軒蔭蘭
皋翠幙映洛湄臨崖濯素手步水舉輕衣沈鈎
出比目舉弋落雙飛羽觴乘波進素俎隨

初學
作逐

流歸

贈河陽詩

叔潘岳爲河陽令

處生化單父子奇
蒞東阿桐鄉建遺烈
武城播絃歌
逸驥騰夷路
潛龍躍洪波
弱冠步鼎鉉
旣立宰三河
流聲馥秋蘭
摛藻豔春華
徒美天姿茂
豈謂人爵多

贈侍御史王元貺

崑山積瓊玉
廣廈構衆材
游鱗萃靈沼
撫翼希天階
膏蘭孰爲消
濟治由賢能
王侯厭崇禮
廻

迹清憲臺樓屈固小往龍翔廼大來協心毗聖
世畢力讚康哉

贈長安令劉正伯

遊鸞憑太虛騰鱗託浮霄過蒙嘉時會假翼陵
扶搖疲憊克時乏及余再同僚並跡侍儲官携
手登皇朝劉侯撫西都邁績參豹喬德厚化必
深政明姦自消萬尋由積簣千里一步超爾其
騁逸軌遠塗固可要

贈隴西太守張正治

二八由唐顯周以多士隆群靈感韶運理翮應
翔風張生拔幽華蘋蘩登二宮未幾振朱錦剖
符撫西戎及子仍同僚贈言貽爾躬威刑有時
用唯德可令終

贈滎陽太守吳子仲

大晉盛得人儲官畜髦士吳侯降高質剖符授
千里垂覆豈他鄉迴光臨桑梓寮類感岐路黎
庶思知恥老氏踰小鱗曹叅寄獄士無謂散邑
陋覆簣由茲起

答楊士安

逆將辭儲宮
栖遲集南畿
不悞百里賤
徒惜年志衰
躊躇顧城闕
怨戀慕端闈
俊德貽妙詩
敷藻發清徽
媿彼褒崇過
感此岐路悲

送盧景宣

楊朱焉所哭
岐路重別離
屈原何傷悲
生離情獨哀
知命雖無憂
倉卒意低迴
歎氣從中發
灑淚隨襟頽
九重不常鍵
閭闔有時開
愧無貯衣獻
貽言取諸懷

迎大駕

南山鬱翠峯洛川迅且急青松蔭脩嶺綠縈被
廣隰朝日順長塗夕暮無所集歸雲乘臆浮淒
風尋帷入道逢深識士舉手對吾揖世故尙未
夷崤函方嶮澁狐狸夾兩轅豺狼當路立翔鳳
嬰籠檻騏驎見維繫俎豆昔嘗聞軍旅素未習
且少停君駕徐待干戈戢

逸民吟

我顧傲世自遺舒志六合由巢是追沐浴洪池

迅羽衣陟彼名山採此芝薇朝雲靈靈行露未
晞遊魚羣戲翔鳥雙飛逍遙轉觀日晏忘歸嗟
哉四士從我者誰

釋奠詩

敦書請業研幾通理尊師重道釋奠崇祀德成
教倫孰云不祉

送大將軍掾盧晏

贈物雖陋薄識意在忘言瓊琚尙友好桃李貴
往還蕭艾苟見納貽我以芳蘭

贈汲郡太守李茂彥

離索何惆悵後會
希河朔貴相忘岐路安
足悲

贈劉佐

要言將誰苦聊以貽友生
念我二三賢規我無
隱情

潘太常集卷之二

晉滎陽潘尼正叔著

明閩漳張燮紹和纂

頌

釋奠頌

有序

元康元年冬十二月上以皇太子富於春秋而人道之始莫先於弄悌初命講弄經於崇政殿實應天縱生知之量微言奧義發自聖問業終而體達至三年春閏月將有事於上庠釋奠于

先師禮也越二十四日景申侍祠者旣齊輿駕
次于太學太傅在前少傅在後恂恂乎弘保訓
之道宮臣畢從三率備衛濟濟乎肅翼贊之敬
乃掃壇爲殿懸幕爲宮夫子位于西序顏回侍
于比壙宗伯掌禮司儀辨位二學儒官搢紳先
生之徒垂纓佩玉規行矩步者皆端委而陪於
堂下以待執事之命設樽篚於兩楹之間陳壘
洗於阼階之左几筵旣布鐘懸旣列我后乃躬
拜俯之勤資在三之義謙光之美彌劭闕里之

教克崇穆穆焉邕邕焉真先王之徽典不刊之
美業允不可替已於是牲饋之事既終享獻之
禮已畢釋玄衣御春服弛齋禁反故式天子乃
命內外群司百辟卿士蕃王三事至于學徒國
子咸來觀禮我后皆延而與之燕金石簫管之
音八佾六代之舞鏗鏘闐闐般辟俛仰可以激
神滌欲移風易俗者罔不畢奏抑淫哇屏鄭衛
遠佞邪釋巧辯是日也人無愚智路無遠邇離
鄉越國扶老携幼不期而俱萃皆延頸以視傾

耳以聽希道慕紫洗心革志想冰泗之風歌來
蘇之惠然後知居室之善著應乎千里之外不
言之化洋溢于九有之內於熙乎若典同皇代
之壯觀萬載之一會也尼昔忝禮官嘗聞俎豆
今廁末列親覩盛美濺漬徽猷沐浴芳潤不知
手舞口詠竊作頌一篇義近辭陋不足測盛德
之形容光聖明之遐度其辭曰

三元迭運五德代微黃精旣亢素靈乃暉有皇
承天造我晉畿祚以大寶登以龍飛宣基誕命

景熙遐緒三分自文受終惟武席卷要蠻蕩定
荒阻道濟群生化流率土後帝承哉丕隆曾構
奄有萬方光宅宇宙篤生上嗣繼期挺秀聖敬
日躋濬哲閎茂留精儒術敦閱古訓遵道讓齒
降心下問鋪以金聲光以玉潤如日之升如乾
之運乃延台保乃命學臣聖容穆穆侍講閭闔
抽演微言啓發道真探幽窮贖溫故知新講業
旣終精義旣研崇聖重師十日告奠陳其三牢
引其四縣旣戒旣式乃盥乃薦恂恂孔聖百王

攸希亶亶顏生好學無違日皇儲后體神合機
兆吉先見知來洞微濟濟二宮藹藹庶寮俊乂
鱗萃髦士盈朝如彼和肆莫非瓊瑤如彼儀鳳
樂我雲韶瓊瑤誰剖四門洞開雲韶奚樂神人
允諧蟬冕耀庭細珮振階德以謙光仁以恩懷
我酒惟清我有惟馨舞以六代歌以九成萃萃
胄子祁祁學生洗心自百觀國之榮學猶蒔苗
化若偃草博我以文弘我以道萬邦蟬蛻矧乃
俊造鑽蚌瑩珠剖石摘藻絲匪玄黃水罔方圓

引之斯流染之斯鮮若金受範若埴在甄上好
如雲下效如川昔在周興王化之始曰文曰武
時惟世子今我皇儲濟聖通理緝熙重光於穆
不已於穆伊何思文哲后媚茲一人實副元首
季洽家邦光照九有純嘏自晉永世昌阜微微
下臣過克近侍猥躡風雲鸞龍是廁身藻芳流
日玩盛事竭誠作頌祇詠聖志

後園頌

芒芒在昔悠悠結繩太樸未散玄化霜凝羲皇
繼踵三代相承五德更王文質迭興天命匪謚
祐謙輔信乃眷我皇光大晉應期納祚天人
是順和氣四克惠澤旁潤神祇告祥四靈效質
游龍升雲儀鳳翳日甘露晨流醴泉涌溢華夏
旣寧八荒靜謐人亦有言我何以休乃延卿士
從皇以遊長筵遠布廣幕四周嘉肴惟芳旨酒
思柔巖巖峻岳湯湯玄流翔鳥鼓翼游魚載浮

明明天子肅肅庶官文士濟濟武夫桓桓講藝
華林肄射後園威儀旣具兮矢斯閑恂恂謙德
穆穆聖顏賜以晏飲詔以話言黍稷旣登貨財
旣豐仁風潛運皇化彌隆征夫釋甲戰士罷戎
遐夷慕義絕域望風無或慢易在始慮終無或
安逸在盈思冲

箴

乘輿箴

有序

易稱有天地然後有人倫有父子然後有君臣
傳曰大者天地其次君臣然君臣父子之道天
地人倫之本未有以先之者也故天生蒸人而
樹之君使司牧之將以導群生之性而理萬物
之情豈以寵一人之身極無量之欲如斯而已
哉夫古之爲君者無欲而至公故有茅茨土階
之儉而後之爲君有欲而自利故有瑤臺瓊室

之侈無欲者天下共推之有欲者天下共爭之
推之之極雖禪代猶脫徒爭之之極雖刳殺而
不避故曰天下非一人之天下乃天下之天下
安可求而得辭而已者乎夫脩諸已而化諸人
出乎邇而見乎遠者言行之謂也故人主所患
莫甚於不知其過而所美莫美於好聞其過若
有君於此而曰予必無過唯其言而莫之違斯
孔子所謂其庶幾乎一言而喪國者也蓋君子
之過如日月之蝕過也人皆見之更也人皆仰

之雖以堯舜湯武之盛必有誹謗之木敢諫之
鼓盤杆之銘無諱之史所以閑其邪僻而納諸
正道其自維持如此之備故箴規之興將以補
過救闕然猶依違諷喻使言之者無罪聞之者
足以自誠先儒旣援古義舉內外之殊而高祖
亦序六官論成敗之要義正辭約又盡善矣自
虞人箴以至于百官非唯規其所司誠欲人主
斟酌其得失焉春秋傳曰命百官箴王闕則亦
天子之事也尼以爲王者膺受命之期當神器

之運總萬機而撫四海簡群才而審所授孜孜
於得人汲汲於聞過雖廷爭而折猶將祈請而
求焉至於箴規諫之順者曷爲獨闕之哉是以
不量其學陋思淺因自擔之餘嘗試撰而述之
不敢斥至尊之號故以乘輿目篇蓋帝王之事
至大而古今之變至衆文繁而義詭意局而辭
野將欲希企前賢髣髴崇軌譬猶丘垤之望華
岱恒星之繫日月也其不逮明矣頌曰

元元遂初芒芒太始清濁同流玄黃錯峙上下

弗形尊卑靡紀赫胥悠哉大庭尙矣皇極啓建
兩儀旣分彝倫永序萬邦已紛國事明王家奉
嚴君各有攸尊德用不勤義農已降暨于夏殷
或禪或傳乃質乃文太上無名下知有之仁義
不存而人歸孝慈無爲無執何欲何思忠信之
薄禮刑實滋旣譽旣畏以侮以欺作誓作盟而
人始叛疑煌煌四海藹藹萬乘匪誓焉憑左輔
右弼前疑後丞一日萬機業業競競夫出其言
善則千里是應而莫余違亦喪邦有徵樞機之

動式以廢興殷監不遠若之何勿徵且厚味脂
毒豐屋生災辛作璇室而夏興瑤臺糟丘酒池
象筋玉杯厥肴伊何龍肝豹胎惟此哲婦職爲
亂階殷用喪師夏亦不恢是以帝堯在位茅茨
不翦周文日昃昧旦丕顯夫德輶如毛而或舉
之者鮮故湯有慙德武未盡善下世道衰末俗
化淺耽樂逸遊荒淫沈湎不式古訓而好是佞
辯不遵王路而覆車是踐成敗之効載在先典
匪唯陵夷厥世用殄故曰櫛君如之何將人是

司牧視之猶傷而知其寒燠故能撫之斯柔而
敦之斯睦無遠不懷靡思不服夫豈厭縱一人
而玩其耳目內迷聲色外荒馳逐不脩政事而
終於顛覆昔唐氏授舜舜亦命禹受終納祖丕
承天序放桀惟湯尅殷伊武故禪代非一姓社
稷無常主四嶽三塗九州之阻彭蠡洞庭殷商
之旅虞夏之隆非由尺土而紂之百尅卒於絕
緒故王者無親唯在擇人傾蓋惟舊白首乃新
望由鈞夫伊起有莘負鼎鼓刀而謀合聖神

夫豈借官左右而取介近臣蓋有
國有家者莫云我聰或此而從莫謂我智聽受
未易其言美疾黜不爲累由夷逃寵遠於脫屣
柰何人王位極則侈知人則哲惟帝所難唐朝
旣泰四族作姦周室旣隆而管蔡不虔匪我二
聖孰弭斯患若九德咸受儁又在官君非臣莫
治臣非君莫安故書美康哉而易貴金蘭有皇
司國敢告納言

論

安身論

蓋崇德莫大乎安身安身莫尚乎存正存正莫重乎無私無私莫深乎寡欲是以君子安其身而後動易其心而後語定其交而後求篤其志而後行然則動者吉凶之端也語者榮辱之主也求者利病之幾也行者安危之決也故君子不妄動也動必適其道不徒語也語必經於理不苟求也求必造於義不虛行也行必由於正

夫然用能免或繫之凶享自天之祐故身不安則始言不從則悖交不審則惑行不篤則危四者行乎中則患憂接於外矣憂患之接必生於自私而興於有欲自私者不能成其私有欲者不能濟其欲理之至也欲苟不濟能無爭乎私苟不從能無伐乎人人自私家家有欲衆欲並爭群私交伐爭則亂之萌也伐則怨之府也怨亂旣構危害及之得不懼乎然棄本要末之徒知進忘退之士莫不飾才銳智抽鋒擢穎傾側

乎勢利之交馳騁乎當塗之務朝有彈冠之朋
野有結綬之友黨與熾於前榮名扇其後握權
則赴者鱗集失寵則散者瓦解求利則託刎頸
之懼爭路則構刻骨之隙於是浮僞波騰曲辯
雲沸寒暑殊聲朝夕異價驚蹇希奔放之跡鉛
刀競一割之用至於愛惡相攻與奪交戰誹謗
噂噍毀譽縱橫君子務能小人伐技風頽於上
俗弊於下禍結而恨爭之不彊患至而悔伐之
未辨大者傾國喪家次則覆身滅祀其故何邪

豈不始於私欲而終於爭伐哉君子則不然知
自私之害公也故後外其身知有欲之傷德也
故遠絕榮利知爭競之遭災也故犯而不校知
好伐之招怨也故有功而不德安身而不爲私
故身正而私全慎言而不適欲故言濟而欲從
定交而不求益故交立而益厚謹行而不求名
故行成而名美止則立乎無私之域行則由乎
不爭之塗必將通天下之理而濟萬物之性天
下猶我故與天下同其欲已猶萬物故與萬物

同其利夫能保其安者非謂崇生生之厚而孰
逸豫之樂也不忘危而已有其進者非謂窮貴
寵之榮而藉名位之重也不忘退而已存其治
者非謂嚴刑政之威而明司察之禁也不忘亂
而已故寢蓬室隱陋巷被短褐茹藜藿環堵而
居易衣而出苟存乎道非不安也雖坐華殿載
文軒服黼黻御方丈重門而處成列而行不得
與之齊榮用天時分地利甘布衣安藪澤沾體
塗足耕而後食苟崇乎德非不進也雖居高位

饗重祿執權衡握機祕功蓋當時勢侔人主不
得與之比逸遺意慮沒才智忘肝膽棄形器貌
若無能志若不及苟正乎心非不治也雖繁計
策廣術藝審刑名峻法制文辨流離議論絕世
不得與之爭功故安也者安乎道者也進也者
進乎德者也治也者治乎心者也未有安身而
不能保國家進德而不能處富貴治心而不能
治萬物者也然思危所以求安慮退所以能進
懼亂所以保治戒亡所以獲存也若乃弱志虛

心曠神遠致徙倚乎不拔之根淨遊乎無垠之外不自貴於物而物宗焉不自重於人而人敬焉可親而不可慢也可尊而不可遠也親之如不足天下莫之能狎也舉之如易勝而當世莫之能困也達則濟其道而不榮也窮則善其身而不悶也用則立於上而非爭也舍則藏於下而非讓也夫榮之所不能動者則辱之所不能加也利之所不能勸者則害之所不能嬰也譽之所不能益者則毀之所不能損也今之學者

誠能釋自私之心塞有欲之求杜交爭之原去
矜伐之態動則行乎至通之路靜則入乎大順
之門泰則翔乎寥廓之宇否則淪乎渾冥之泉
邪氣不能干其度外物不能擾其神哀樂不能
盪其守死生不能易其真而以造化爲工匠天
地爲陶鈞名位爲糟粕勢利爲埃塵治其內而
不飾其外求諸已而不假諸人忠肅以奉上愛
敬以事親可以御一體可以牧萬民可以處富
貴可以居賤貧經盛衰而不改則庶幾乎能安身矣

序

贈二李郎詩序

元康六年尙書吏部郎汝南李光彥遷汲郡太守都亭侯江夏李茂曾遷平陽太守此二子皆弱冠知名歷職顯要旬月之間繼踵名郡離儉劇之勤就放曠之逸枕鳴琴以俟遠致離別之際各斐然賦詩

碑

益州刺史楊恭侯碑

君乾靈之醇德挺一世之殊量稟天然不渝之
操體蘭石芳堅之質夫其器騰弘濟智能周達
窮不怨否顯不矜泰履行則爲模楷吐言則成
隱括德實克於內而光華發乎外也君發迹州
國委質明主自景皇帝攝政文皇帝繼業值天
下多虞疆場未靜以君先帝所拔懷寶後時而
深達遠識有經國之量故爲腹心謀臣而監度

政事焉君出則簡練熊羆職司是圖入則從容
諷議盡規帷幄其所以進可替否決疑定策者
皆言効於既往而事簡於帝心君再臨司官三
撫名郡方將宣文德以來遠建武功於所牧銘

曰

天生蒸民有類有則誕育恭表應期秀特文兼
六行武備七德忠肅弘毅柔嘉溫克機事無瑕
臨疑不惑我謀既精我化既清澤流河朔勳著
王庭西南未夷侯其是寧上天不惠早世潛靈

給事黃門侍郎潘君碑

君遇孫秀之難闔門受禍故門生感覆臨以增
慟乃櫨碑以紀事

附錄

潘尼傳

唐太宗

尼字正叔，勗，漢東海相父，蒲平原內史。並以學行稱。尼少有清才，與岳俱以文章見知。性靜退，不競唯以勤學著述爲事。著安身論以明所守。初應州辟，後以父老辭位，致養太康中。舉秀才爲太常博士，歷高陸令、淮南王允鎮東叅軍。元康初，拜太子舍人。上釋奠頌，後出爲宛令。在任寬而不縱，恤隱勤政，厲公平而遺人事。入補

尚書郎俄轉著作郎爲乘興箴及趙王倫篡位
孫秀專政忠良之士皆罹禍階尼遂疾篤取假
拜埽墳墓聞齊王冏起義乃赴許昌冏引爲叅
軍與謀時務兼管書記事平封安昌公歷黃門
侍郎散騎常侍侍中秘書監永興末爲中書令
時三王戰爭皇家多故尼職居顯要從容而已
雖憂虞不及而備嘗艱難永嘉中遷太常卿洛
陽將沒携家屬東出成臯欲還鄉里道遇賊不
得前病卒於塢壁年六十餘

史臣曰正叔含咀藝文履危居正安其身而後
動契其心而後言著論究人道之綱裁箴懸乘
輿之鑒可謂玉質而金相者矣

贊曰尼標雅性夙聞詞令

贈潘尼

晉郭璞

杞梓生南荆奇才應世出
擢穎蓋漢陽鴻聲駭
皇室遂應四科運朱衣耀玉質

祖道畢雍孫劉邊仲潘正叔

晉陸機

皇儲延髦俊多士出幽遐適值

一作遂

時來運與

子遊承華執笏崇賢內振纓層城阿畢劉贊文
武潘生蒞邦家感別懷遠人願言歎以嗟

遺事

潘正叔有琴題曰抱寢八分書

古琴疏

潘尼與同僚飲主人有琉璃盃使客賦之尼於座立成

集評

李鷹黃華之唱正叔綠縈之章雖不具美而文
彩高麗並得蚪龍片甲鳳凰一毛

詩品